



Sa svim jezičkim raznolikostima u Evropi i širom svijeta, postoje brojne prednosti koje su povezane s učenjem i poznavanjem stranih jezika. Jezici mogu pomoći ljudima da stječu prijateljstva, uživaju na odmoru u inostranstvu i lakše putuju, napreduju u karijeri ili uživaju u zadovoljstvima iz drugih kultura. Učenjem jezika mogu proširiti vlastite horizonte.



Evropski dan jezika obilježava se 26. septembra širom Evrope. Ovaj dan po prvi put je obilježen 2001. godine u organizaciji Vijeća Evrope kao dio aktivnosti održanih tokom "Evropske godine jezika", a s ciljem poticanja jezične različitosti, višejezičnosti i cjeloživotnog učenja. Time Vijeće Evrope, koje broji 47 članica, želi potaknuti 800 miliona Evropljana da uče jezike, bez obzira na životnu dob, te da li idu u školu ili ne.



Stručnjaci procjenjuju da postoji zapanjujuća cifra od 5.000 do 10.000 jezika kojima se danas govori u svijetu. Kao dio svojih nastojanja da promovira mobilnost i razumijevanje među kulturama, EU je učenje jezika odredila kao prioritet, te finansira brojne programe i projekte iz te oblasti.



Učenje novog jezika, kao i učenje sviranja muzičkog instrumenta, zahtijeva određeni napor, a rezultat je nevjerovatna nagrada - putovanje do cilja može biti ugodno kao i sam dolazak na cilj. Osim toga, poslovi koji se odnose na jezike, uključujući prevodilačke, dobro kotiraju na ljestvici traženih poslova u EU.



Lingvisti često mogu ostvariti karijere u različitim sektorima, uključujući turizam i izdavačku djelatnost, u multinacionalnim organizacijama ili preduzećima.



Poznavanje jezika može pomoći u razumijevanju stranih kultura i društva, ali i da iskoristite poslovne prilike kao i one tokom studija. Naprimjer, tri četvrtine velikih kompanija u Evropi imaju sisteme upošljavanja osoblja koje posjeduje jezičke vještine.



Mnogi ljudi odgađaju učenje jezika jer smatraju da će im trebati životni vijek kako bi naučili sve riječi i gramatiku. Međutim, dokazano je da uz pravi pristup i motivaciju većina ljudi može usvojiti barem osnovnu upotrebu stranog jezika.



Jezici su važan prioritet za Evropsku uniju. Unija ne samo da slavi višejezičnost, nego je nastoji podsticati. Ustvari, promocija učenja jezika i jezičke raznolikosti jedan je od ciljeva programa „Cjeloživotno učenje“ vrijednog sedam milijardi eura (2007-2013.). Svi potprogrami - Comenius (za škole), Erasmus (za više obrazovanje), Grundtvig (obrazovanje odraslih) i Leonardo da Vinci (za profesionalno obrazovanje i obuke) - podržavaju učenje jezika.

Neke od tih aktivnosti posebno su usmjerene ka tome kako bi se omogućilo nastavnicima da se sastaju i razvijaju metode učenja jezika i potrebnih materijala. Projekt „Ujedinjena Evropa kroz kulturu“ kreira opsežan program obuke za nastavnike koji se bave obrazovanjem odraslih.

Jedna zanimljiva opcija za poboljšanje znanje jezika je prijava na EU grant za mobilnost, što omogućava odlazak na

studij, obuku ili rad u drugoj zemlji. To ne samo da pruža mogućnost da steknete dodatna znanja i nove vještine, nego vam pomaže da bolje upotrebljavate druge jezike i imate dublji uvid u društvo i kulturu drugih zemalja. Na sličan način EU pruža podršku evropskoj službi volontera tako što omogućava mladima da rade u drugim zemljama, dok istovremeno razvijaju svoje jezičke sposobnosti i stječu dublje razumijevanje o kulturi zemlje domaćina.

U EU 23 službena jezika

Od svih jezika u svijetu, tri petine čovječanstva govori 12 najviše korištenih, dok 30 najčešćih jezika koristi više od tri četvrtine ljudi na svijetu.

Od ovih brojki, pola milijarde stanovnika, koliko ima u 27 zemalja članica EU, govori 23 službena jezika, da ne spominjemo sve regionalne jezike i jezike manjina. Njemački je najrasprostranjeniji jezik u EU, sa 90 miliona izvornih govornika, a slijede ga engleski, francuski i italijanski.

Delegacija Evropske unije u Bosni i Hercegovini
Skenderija 3a, 71 000 Sarajevo, BiH
Tel: +387 33 254 700
www.europa.ba



Evropska unija

Evropski dan jezika

26. septembar

